

Inuussutissarsiornermut, Niuernermut, Aatsitassanut, Inatsisit Atuutsinneqarnerannut  
Naligiissitaanermullu Naalakkersuisoq  
Naalakkersuisoq for Erhverv, Handel, Råstoffer, Justitsområdet og Ligestilling

Inatsiseqarnermut ministerimut Peter Hummelgaard-imut

Ulloq: 23-01-2025  
Suliap normua: 2023 - 4040

Postboks 930  
3900 Nuuk  
Oqarasuaat (+299) 34 68 00  
E-mail: asn@nanoq.gl  
www.naalakkersuisut.gl

## **Inatsiseqarnermut ministereqarfiup suliassaqarfiani 2025-imut Naalakkersuisunit suliassat pingaarnersiorneqarneri**

Danmarkimi inatsisinik atuutitsinermit suliassaqarfimmi pitsanngorsaanerit suliniutillu Kalaallit Nunaanni ukiumoortumik suliassanik pingaarnersiuiinerni ukkanneqartariaqannginnerat siusinnerusukkut oqaatigisarsimagakku, aallarniutitut innersuussutigerusuppara.

Naalagaaffeqatigiit iluanni naligiittoqarneranik oqaatigisartakkatik qallunaat naalakkersuisuisa ilumoorukkunik, taava naalagaaffiup sinnerani suliniutit ingerlaavartumik Naalakkersuisunut saqqummiunneqartarnissaat, aamma ukiumoortumik suliassanik pingaarnersiuiinerni utaqqinagit naammassineqarnissaat pissusissamisoortuusaaq.

Taamaammat ulloq 10. Januar 2025 Københavnimi ataatsimiinnermi pitsanngorsaatinani tamani Kalaallit Nunaata ingerlaavartumik eqqarsaatigineqartarnissaa, aamma Danmarkimisut Kalaallit Nunaani innuttaasut inatsisitigut isumannaatsuunerup sullissinerullu assigiissinneqarnissaasa anguneqarnissaannut Nordatlantkontorimi naammattunik aningaasaliisoqarnissaa isumalluutinillu immikkoortitsisoqarnissaa, aamma kinguaattoornerup pilersinneqarsimasup appartinneqarnissaa, aammaarlunga noqqaassutigisimavara.

Naalakkersuisut 2021-mut, 2022-imut, 2023-imut aamma 2024-imut suliassanut pingaarnersiorsineqartussatut noqqaassutigisimasaattut immikkoortunut killiffiit pillugit, Inatsiseqarnermut ministereqarfiup ulloq 15. oktober 2024 allagaq nassiussimavaa, aamma naak Naalakkersuisut 2024-imi taamaallaat pingaarnersiugassatut kissaatigisanik ikittuinnarnik saqqummiussisimagaluartut, suli suliniutinik arlalinnik sulilunniit aallartinneqarsimanngitsunik peqarpoq. Naalakkersuisut siusinnerusukkut pingaarnersiorneqartussatut kissaatigisimasaannik immikkoortunik, aamma suli naammassineqanngitsunik suliagarnerup tamatuma peqatigisaanik tuavisaarutigineqarnissaa naatsorsuutigineqarpoq.

Akerleriinnik isumaqatigiissitsiniartarnermut siunnersuisoqatigiit pillugit nalunaarummik, paasissutissat illersugaanerit pillugu peqqussut malillugu Kalaallit Nunaata nunatut pingajuusutut akuersissutigineqarnera, atuisut suliffeqarfiillu akornanni digitaliusumik isumaqatigiissusiorsinnaanerup akuerineqarnissaa siunertaralugu atuisut illersorneqarnissaannut inatsisit nutarterneqarnerat aamma Kalaallit Nunaata Istanbulimi isumaqatigiissummut ilanngunnissaata akuersissutigineqarnissaa, Inatsisartut 2022-imi majimi

akuersissutigereersimasaat, tassunga atatillugu assersuutigalugu innersuussutigaaakka.

Sulit qulaani taaneqartut aamma naammassillugit suliarineqarnissaat aamma ukiut siuliini pingaarnersiugassatut suliassat allat sapinngisamik sukkanerpaamik tuavissaarunneqarnissaat, massakkut kimigiisiutigisariaqarpara.

Suliniutissat nutaat pingaarnersiugaanatik tulleriiaarneqartut:

- 1) Inatsisunik unioqqutitsisut tunniunneqartarnerat pillugu Kalaallit Nunaannut inatsit nutaaq (Inatsisit atuutsinneqarnerannut suliassaqarfik)
- 2) Inuit atornerlunneqartarnerat pillugu Kalaallit Nunaanni pinerluttulerinermi inatsimmi aalajangersakkamik ilanngussineq (Inatsisit atuutsinneqarnerannut suliassaqarfik)
- 3) Eqqugaasunut aningaasaateqarfik pillugu Kalaallit Nunaannut inatsit nutaaq (Inatsisit atuutsinneqarnerannut suliassaqarfik)
- 4) Pisisarnermi isumaqatigiissuteqartarnermik inatsisip peqqussutinngortinneqarnissaanut iluaqutaasumik, Akiligassarsilluni pisinermik inatsisip Kalaallit Nunaanni atortuulersitaaneramik peqqussutip atorunnaarsinneqarnissaa (Inuussutissarsiorneq Niuernerlu)
- 5) Isumaqatigiissuteqartarnermi inatsimmik allannguinerit peqqussutinngortinneqarnera (Inuussutissarsiorneq Niuernerlu)

Inussiarnersumik inuulluaqqusillunga



Naaja H. Nathanielsen